

Itoizko urtegiak segurtasun «arazo larriak» ditu, ikerketa batek dioenez

Bazterreko lur-mazelak mugitu eta urak horma gainezkatu egin lezakeela salatu dute

A.B. / Iruñea


Itoizko Koordinakundearen enkarguz eginiko ikerketa geologiko baten arabera, urtegiaren bazterreko lur-mazeletan labaintze arrisku larriak daude, eta horrek, inguruan dagoen sismikotasun moderatuarekin, oso arriskutsu bihurtuko luke urtegia Agoitz edo Zangozako herrientzat.

ITOIZKO urtegi barruan hogeimiloi metro kubo lur eta lokatz erortzeko arriskua dago, ezkerreko lur-mazelak egongaitzak izaki. Urtegiko urak horma gainezkatzea eragingo luke horrek, eta ondorio «birrintzaileak» izango lituzke. Gainera, urtegiaren hondoan bertan dauden lokatz koladak mugituz gero, estali egingo lituzkete urtegiaren ahoak, eta horrek erabat deuseztatuko luke urtegia.

Horiek dira Zaragozako Unibertsitateko ikerketa geologiko baten emaitzak, urtegi azpiko herri eta bizilagunendako arrisku biziak ondorioztatzen dituztenak. Itoizko koordinakundeak eta Greenpace talde ekologistak atzo azaldu zutenen, lanak bultzatzen ari direnen zerbitzu teknikoek bazuten arriskuon berri, baina emaitzak ezkutu edo daukaten garrantzia ez dietela eman salatu egin zuten.

«Aukera litekeen tokirik txarrena»

Azterketa argi eta garbia da bere ondorioetan. Urtegiaren ezkerreko paretan dauden estratoak oso egongaitzak dira, eta bata bestearen gainean mugitzeko arrisku bizia dute, beraz. «Aukeratu litekeen tokirik txarrenetakoa da» esan zuen atzo Iruñean ikerketaren egile Antonio Casasek. «Lur-mazelak estratifikazio planoen norabide bera duela kontuan hartuta, eta urtegiak izango duen uraren



Itoizko urtegia, artxiboko argazki batean.

presioa gehitzen badiogu, bada ondorioztatu daiteke lur bolumena erori egin daitekeela urtegi gainean».

Urtegiaren hondoan dauden lur-mugimenduei dago kienez, geologoak azaldu zuen lur-mazeletakoak baino mantsoagoak direla, baina estali egin litzakeela urtegiaren ahoak, eta horrek, urtegia

bera ezdeus bihurtzeaz gain, kolokan jar lezakeela hormaren egonkortasuna. Casasek gaineratu zuen ez dagoela soluziobide teknikorik hogei milioi metro kuboko lurren mugimendua galerazteko.

Itoizko koordinakundeko Maria Jose Beaumontek aipatu egin zuen 1989an eginiko ikerketa bat; labainke-

ten arriskuaz ohartarazten zuen horrek. Nahiz eta ofizialki eskatu, Herrilaren departamentuak oraindik ez diela txostena eman salatu zuen Beaumontek. Koordinakundeko abokatuak esan zuen erantzukizunak eskatu beharko liratekeela txosten honen emaitzak azkenean baieztatzen badira.

Gobernua: «Inolako arriskurik ez»

NAFARROAKO GOBERNUAK, Herrilan zuzendari nagusi Alvaro Mirandaren ahotik, atzo bertan erantzun zien Itoizko koordinakundeak egin salaketei, eta «erabat faltsuak» zirela azpimarratu zuen. Mirandak azaldu zuen Itoizko urtegiak, «herrilan guztiek bezala», txosten geologiko eta geotekniko pila duela; baina hortik inolako arriskurik ez

dela ondorioztatzen nabarmendu zuen. «Akusazioa zeharo faltsua da. Horrela-ko gauzeekin ezin da jolastu», azaldu zion Mirandak Europa Press agentziari.

Mirandak, halaber, ukatu egin zuen egun, koordinakundeak esan zuen bezala, teknikariak daudela urtegian azterketa geologiko edo geoteknikoak egiten. «Ukatu egiten dugu

governuko inor ari dela Itoizko urtegiaren ikerketa geologiko egiten, inor ez», esan zuen Mirandak. Espainiako Ingurugiro Ministerioan, nolanahi ere, onartu egin zuten lanean ari direla, baina inspektzio «logikoak» zirela esan zuten Urtegi Sailean. Mirandak ere onartu zuen, inplizitoki, koordinakundeak aipatu txosten ofiziala

egon, badagoela, eta eman egingo diela urtegiaren kontrakoei. «Horretarako oraindik epea bada», esan zuen.

Herrilan zuzendariak, halaber, esan zuen koordinakundekoak «asmatu» egiten dituztela argudioak, eta «gezurra» esaten dutela. «Ez dago arriskurik, eta hori esaten dut Herrilan Zuzendari eta bide-injenieri naizen aldetik».

Bilboko Ekialdeko saihebidereen lanekin aurrera segituko du Diputazioak

■ Proiektuaren ibilbidea «sententziak bermatzen» duela diote foru agintariek

Erredakzioa / Bilbo

BIZKAIKO Diputazioak Bilbo Ekialdeko saihebidereen ibilbideari eutsiko dio, EAE Euskal Autonomia Erkidegoko Auzitegi Nagusiak kaleratu duen «sententziak hala bermatzen» duelako. Horrela jakinerazi zuten Jose Luis Bilbaok eta Jose Felix Basozabalek, Lehendakaritza eta Herri Lan diputatuek, atzo eskaini zuten prentsaurrekoan.

Bilbaok azaldu zuenez, Otxarkoagako auzokideek proiektuaren kontra aurkeztutako errekursoak inpugnazioarako 14 argudio jasotzen zituen, eta sententziak «prozedura gaiei buruzko» bi baino ez ditu onartu. Lehenengoa, proiektuaren erakusketa publiko ezari buruzkoa da. Hala ere, Diputazioaren ustez tramite hori bete egin zuten Udalak kalera- tu zuen testu berregokitu- an, non ibilbide aldaketa azaltzen zen.

Auzitegi Nagusiko sententziak aurreikusten duen bigarren arrazoi- a da Diputazioak ez zuela Eusko Jaurlaritzako Nekazaritza saileko baimenik bertoko 48 zuhaitz botatzeko. Ildo horretatik, Bilbaok adierazi zuenez, «baimen hori bota beharreko zuhaitzak mendian edo nekazaritza gunean daudenean bakarrik eskatu behar zela uste genuen. Lanak egin diren tokia hiri gunea da eta, ondorioz, ez da baimenik eskatu behar».

Aldeko sententzia

Lehendakaritza diputatuaren arabera, Auzitegi Nagusiaren sententzia Diputazioaren tesien «aldekoa» da eta auzokide- entzat, ostera, «zartada» bat da.